

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Chief Minister Pu Lalduhoman Mizoram chu a chhunga chengte inngeih taka an chen theihna chhan pawimawh tak chu hel pawl awmlohna state a nih vang a ni, a ti.
- 2. Home Minister Pu K. Sapdanga chuan Mizoram Home Guard hi dinhmun zahawm leh tangkai taka hlankai a ni dawn tih a sawi.
- 3. Union Minister Pralhad Joshi chu Dharmendra Pradhan-an banna a thehluh hnuah Education Minister atan ruat a ni.
- 4. Prime Minister Narendra Modi chuan vawiin, Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn.

<><><>

JT HNAMPUAL MEET

Chief Minister Pu Lalduhoman Mizoram chu a chhunga chengte inngeih taka an chen theihna chhan pawimawh tak chu hel pawl awmlohna state a nih vang a ni, a ti a.

Nimina Aizawl-a Joint Hnampual Meet-2026, Joint Hnampual Students' Organisation (JHSO) buatsaih a hmanpuinaah he thu hi sawiin Chief Minister chuan kumin April ni 30 khan hnampual helpawl awm chhun HPC (D) Lalhmingthanga Sanate Faction-te chuan ralthuamte tungin, Mizoramah hnampual hel pawl awm tawh lovin, remna leh muanna chu a tak ramin a lo thlen thu a sawi a. Hel pawl awm lohna state chhawm nung zel turin kalkhawmte chu a fuih bawk a ni.

Chief Minister chuan Zofate chu inpumkhata an awm a pawimawh thu a sawi a, Hnam inpumkhatna turin tawng thuhmun hman tlan a pawimawh a, Mizoramah hnampual tin ten mahni tawng theuh humhalh chungin inpawh lehzual turin tawng thuhmun hman theih a tul a ti a.

Joint Hnampual Meet buatsaihtu JHSO hi Hnampual zirlai pawl hrang hrang- Mizoram Bawm Students Union, Ranglong Student Union, Hmar Student Association, Pang Zirlai Pawl, Siamsinpawlp, Lai Student Association leh Mara Student Organisation inzawmkhawm an ni.

<><><>

HOME MINISTER

Home Minister Pu K. Sapdanga chuan Mizoram Home Guard chu dinhmun zahawm leh tangkai taka hlankai a ni dawn tih a sawi.

Pu K. Sapdanga hian tun hnai khan MRHG basic training 42nd batch Passing out Parade chu CTI-ah a hman pui a. Home Minister chuan, Home Guard Volunteer lak dan leh enkawl dan mumal tak awm thin chu ngaih pawimawh a ni ngai lo a, laina leh duhsak zawnga inthun khawmna atan hman a lo ni thin, a ti.

Home Guard lak dan Kalphung Thar siam a ni a ti a, tun atang chuan HSLC pass chin chauh dil theihin siam a ni a ti a, physical fitness test-in mark a pu ang a, tlingte chu uluk takin interview neih a ni ang a, mark hmuh that dan indawn thianghlim takin lak a ni tawh dawn a ti bawk.

Home Minister-in a sawi danin, Home Guard Volunteer post ruak 94 atan diltu 4000 chuang zingah graduate ringawt pawh sang tel an awm. Kum thum atan lak an ni ang a, an nungchang enin thawh chhunzawm a, kum 60 an tlin thlenga pawhsei theih a ni. MRHG Volunteer-te tan an ban huna an chhuahpui tur PE saving scheme duansak an ni.

<><><>

BLOOD DONATION

Ram chhung state tina thisen pek tum, Delhi mi Atul Singh, chu nimin khan Mizoramah lo kalin a mamawhtute tan Civil Hospital, Aizawl-ah thisen a pe.

Atul Singh hi Delhi atanga lo kal niin, nimin khan Mizoram a lo thleng a, vawiin vek hian Civil Hospital, Aizawl-ah a mamawhtute tan thisen a pe a, heti hian state 24-ah thisen a pe tawh a, state 4-Tripura, Manipur, Kerala, leh Tamil Nadu-ah te thisen pek a la hmabak a ni. Akashvani Aizawl News zawhna chhangin, Atul Singh chuan hetiangam ram chhung state hrang hranga thisen pe tura hma a lak chhan chu thalaite leh mipui nawlpuite thisen pe tura chawhphurna leh rilru hriselna chungchang zau zawka thehdarh a ni tih a sawi.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

DRONE CAPSULE TRAINING

Drone Training Capsule-I (NER) hmasa ber chu State Training Centre leh Mizoram University, Tanhril, Aizawlah tun thla July ni 15 atanga nimin thleng khan hlawhtling taka neih a ni.

He training programme ah hian 09 Group Headquarters of NCC Directorate, North Eastern Region aiawh NCC cadet 114 an tel a, Cadet-te hian Drone drone

technology chuhuakthar leh technical lama hriatna pawimawh leh operational skills te nen kimchang takin an zir a, cadet te hian Solomon's Temple, Aizawl Peak View leh Lalsavunga Park Aizawl tiamin Aizawla hmun pawimawh tak tak an tlawh bawk a ni.

<><><>

I DAY FOOTBALL

Mizoram Football Association-in India Independence Day denchhena a buatsaih thin ‘I Day Football Tournament 2026’ chu naktuk atangin khelh tan a ni ang.

Inelna hi RG Stadium-ah neih a ni dawn a, team 12 an inlan dawn a ni. Mizoram Premier League team 8, Aizawl District Football Association Fist Division team 2 leh state pawn atangin team pahnih (Ganggam SC (Churachandpur-Lamka) leh RFYC-Mumbai) te an lo tel dawn a ni.

Naktuka match hmasa ber hi chawhma dar 11-ah Chanmari leh Dinthar ten an khel dawn a, chawhnu lamah Saikhamakawn leh Mizoram Police te an inhmachhawn ve leh bawk ang.

<><><>

Education Minister

Union Minister Pralhad Joshi chu Dharmendra Pradhan-an banna a thehluh hnuah Education Minister atan ruat ani.

A portfolio chelh lai mek thlah loin, Education Minister nih hi a kawp dawn a ni. Pralhad Joshi hi Minister of Consumer Affairs, Food and Public Distribution leh New and Renewable Energy Minister ani mek a, President Droupadi Murmu chuan Union Council of Ministers atanga Dharmendra Pradhan a banna thehluh chu a pawm tawh a ni.

<><><>

PM MANN KI BAAT

Prime Minister Narendra Modi chuan vawiin, Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 136-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>